

# 1 Korin

<sup>1</sup> Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

<sup>2</sup> Korin oun Negur nē sios ã bun, pas enei matotkeneik. Å Kristus Jesus bun fateuleī fen, fateul ubodõgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ī yana dalesedig anidi geid weim iweignein.

<sup>3</sup> Negur neda Tamada ado Odug Jesus Kristus neid wau ifenēyā ado wau inosiya, ã bun ibodōf.

## *Pol Negur De Fiyen*

<sup>4</sup> Aya wededem ã nigin Negur de afiyēdig, ere nigin, yagon wau ifenēyā Kristus Jesus bun ã ifenein. <sup>5</sup> Ere nigin, Jesus bunem ereb ereb ganan bun, ã kisi feleya ifenein, are ãgenei wogō ganan ado keleī ganan bun, <sup>6</sup> ere nigin, Kristus nigin neda wogōyā, ã bun megeir ifaren. <sup>7</sup> Anī nigin, ã neda Odug Jesus Kristus yaorouf nigin wauī fatuk unog fen, tarig mog, ã Awa Uur nē ege luwa taka to lau gef. <sup>8</sup> Jesus ã totol irouyeik ile, idikeleya bun ilauf, anī bunem, neda Odug Jesus Kristus isiyouf nē naa bun, ã bouweī od sāf. <sup>9</sup> Negur ī, yagon Naal Jesus Kristus, neda Odug geid, ã nigal gouf nigin iweignein, ī ereb yef, de age fouf bagai.

## *Sios Atun Fara Fiya*

<sup>10</sup> Turau tar, aya neda Odug Jesus Kristus yana bunem totol bagai arokeneik, are ã atun fara fiya

taka to ibodōf nigin, ã ganan abob nigin wauī tekelei yen ken, ã wauī ado kisi tekelei bagai ubodōgouf. <sup>11</sup> Neu turau tar, tunī Kloe nē ibor bun tamal dirokanaan, are ã atun luwa irouya ibodok. <sup>12</sup> Aya enei wogō auf, are eig fiya, ã atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

<sup>13</sup> Kristus ī fara furu fen de? Aya Pol ī, ã nigin aa tetek bun dun de? Ñ aya Pol yanau bunem naan digunein de? <sup>14</sup> Aya Negur de afiyek, are aya ã taka to naan agunen, Krispus ado Gaius dogol naan agunēdin. <sup>15</sup> Anī nigin, taka nem to irōf, “Aya Pol yana nem naan agun.” <sup>16</sup> (Momoi, aya Stefanas nē ibor tareg naan agunēdin, anī teten, takag naan agunen be anī, to kisi afef.) <sup>17</sup> Ere nigin, Kristus ī aya naan agunēdiyouf nigin to sur fiyan, anī ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anī bunem sā.

### *Kristus ī, Negur Nē Kisi Biya Ado Megeir*

<sup>18</sup> Jesus aa tetek bun laa fen ya od anī, idi inanakelediyouf anidi bun are neneya, anī ere, ada isennadaf bun, od are Negur nē megeir. <sup>19</sup> Ere nigin, Negur nē Itotoya bun eig ye irok:

“Aya tamo kisi biya adodo neid kisi biya daū afalauf,  
aya tamo keleī odug adodo neid keleī ale-  
lauf.”\*

<sup>20</sup> Tamo kisi biya adodo nain? Tamo keleī odug adodo nain? Sain enei nē keleī yaleya nigin luwa

---

\* <sup>1:19:</sup> Asaia 29:14

irouya tamo nain? Negur ī tenebur enei nē kisi biya anī to neneya inon de? <sup>21</sup> Negur nē kisi biya bunem, tenebur tamo dogo neid kisi biya anim, Negur nigin to kelein, anī nigin, neneya od dedig anī wogō taudig bunem, idi momoi def anidi isennēdiya nigin, Negur wau al fen. <sup>22</sup> Juda idi memelik nē uris dilouf nigin dirōdig, Grik idi kisi biya anī dimirēdig. <sup>23</sup> Anī ere, ada Kristus aa tetek bun dun anī wogō taudig, od anī Juda idi bun, ye tū fiya od, haiden idi bun, are neneya od, <sup>24</sup> anī ere, idi Juda ado Grik Negurem iweignēdin anidi bun, Kristus ī Negur nē megeir, Negur nē kisi biya. <sup>25</sup> Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

<sup>26</sup> Turau tar, ā naig be fiya ufareg mog, ā iweignein anī kisi gouf. Ā musei sam, tamo nē keleī bunem, kisi biya ado wowā gen. Musei sam totol ado wowā gen. Musei sam yeneī ado wowā gen. <sup>27</sup> Anī ere, Negur kisi biya adodo mama ifenēdiyout nigin, tenebur enei nē neneya igirnēdin. Negur ī megeir adodo mama ifenēdiyout nigin, tenebur enei nē folo reya igirnēdin. <sup>28</sup> Negur ī tenebur enei nē yeneid sāsā, meleid irim lai difedig ado, ereb taka sā dedig anī igirnēdin, are ereb ado dedig anī, yana sa kalauf nigin age fen, <sup>29</sup> anī bunem, Negur mala bun, taka nem yogo yana to yalesauf. <sup>30</sup> Negur nigin ā Kristus Jesus bun ubodōgef, Jesus ī ada nigin Negur bunem kisi biya wō yen, are ada ī bunem madur bagai, fateul wowā tau fen, isennēya talen. <sup>31</sup> Anī nigin, Negur nē Itotoya bun eig ye irok,

“Tamo ī yogo yana yalesef are, Odug ereb age fen anī nigin yana yalesauf.”†

## 2

<sup>1</sup> Turau tar, aya ā gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun. <sup>2</sup> Ere nigin, aya ā geid tabodon sain, aya ereb ereb ganan wederou tu kel fen, Jesus Kristus ado, ī aa tetek bun laa fen anī dogol kisi afouf nigin kisi afokelen. <sup>3</sup> Sain aya ā gein asin, aya totolou sā, fatuk bagai kumī tererē aun. <sup>4</sup> Neu od ado neu wogōya, are kisi biya nē, wauī faleiya nē od bunem sā, Awa Uur nē megeir nē ifelnēya bunem, <sup>5</sup> are āgenei momooya, tamo nē kisi biya bun to ibodōf, Negur nē megeir bun ibodōf nigin age afen.

### Awa Uur Nē Kisi Biya

<sup>6</sup> Ada kisi biya nē od atīya anidi atun wogō taudig, anī ere, kisi biya anī, are sain enei nē sā, sain enei nē uyu irouya, fau inanakelediyouf anidi neid sā. <sup>7</sup> Anī ere, ada, Negur nē waa kisi biya anī, wogō taudig, are iminēyan ibodok, teneub kare fiya sā mog Negur neda fula fiya medeīya nigin mogo igirin anī. <sup>8</sup> Sain enei nē uyu irouya takam, kisi biya anī to kelein. Idi kisi biya anī keleim are, idi fula fiya medeīya nē Odug aa tetek bun to dum. <sup>9</sup> Anī ere, Negur nē Itotoya eig ye irok kilei:

“Negur nigin waud laa fedig idi nigin Negur dodok fen anī,

---

† 1:31: Jeremaia 9:24

malam taka to ilen,  
weder takam to karī yen,  
kisi takam to fokō yen.”\*

**10** Anī ere, Negur yogon Awa Uurem ada bun anī yaor fen.

Awa Uur ī ereb ereb ganan fai yeledig, Negur nē ereb ereb ilon bagaig fai yeledig. **11** Tamo atun aim, tamo taka nē kisi keleī? Are tamo anī nē uurem dogol keleī. Age fiya bagai, tamo takam Negur nē kisi keleī sā, Negur nē Awa Uurem dogol keleī. **12** Ada teneub enei nē uur to talen, anī ere, ada Awa Uur Negur bun tamal talen, are ereb Negur wau sā ifanadan anī, ada keleī youf nigin age tafen. **13** Ada enei anī wogō taudig, are tamo nē kisi biya bunem od difelnadan anī bunem sā, are od Awa Uurem ifelnadan anī bunem. Ada Awa Uur nē od bunem Awa Uur nē kisi wogō taudig. **14** Tamo Awa Uur sā ī, Negur nē Awa Uur bun tamal ereb isif anī to yale iroudig, ere nigin, yogon karīya bun, are neneya. ī anī keleīya nigin kisi feleya sā, ere nigin, are Awa Uur adodom dogol es difedig. **15** Awa Uur ado tamo ī, ereb ereb ganan nigin es fedidig, anī ere, ī yogo taka nem to es fiyēf. **16** Negur nē Itotoya eig ye irok:

“Aim Odug nē kisi kelei ken,

ī faded fiyēf?”†

Anī ere, ada Kristus nē kisi ado.

### 3

#### *Sios Bun Fara Fiya*

---

\* **2:9:** Asaia 64:4    † **2:16:** Asaia 40:13

<sup>1</sup> Turau tar, aya ã momoiya nigin atīya gen to ayein, ã teneub enei nē dogol, ã Kristus bun momou gen ayein. <sup>2</sup> Aya su afenein, saaf totol anī to afenein, ere nigin, ã anī nigin to saika gen. Momoi, ã gamag fau to saika gef. <sup>3</sup> Æ fau teneub enei nē dogol ubodōgef. Æ atun, kiyeī ado luwa irouya ibodok, anī nigin, ã fau teneub enei nē sā de? Æ teneub enei nē tamo gen to ago gef de? <sup>4</sup> Takam irok, “Aya Pol dō afef,” takam irok, “Aya Apolos dō afef,” ago gouf are, ã teneub enei nē tamo sā de?

<sup>5</sup> Agef ilauf are, Apolos ī ai? Pol ī ai? Amā Negur nē kabī tamo dogol, amā bunem ã momoi gen, are Odugem kabī morou morou ifanaman kilei. <sup>6</sup> Ayam faat atenē di, Apolosem naan fen, anī ere, Negurem odugouf nigin age fen. <sup>7</sup> Anī nigin, faat itenēya tamo ado naan fiya tamo are ege, anī ere, Negur ī yogo dogol odug, ere nigin, ī ereb odugouf nigin age fedig. <sup>8</sup> Faat itenēya tamo ado naan fiya tamo, idi karīya tekelei ado. Negur idi mugu mugu kabī dalen kilei, mala solo ifenēdiyouf. <sup>9</sup> Ere nigin, amā Negur nē kabī tura tar, ã Negur nē kabī akor, Negur nē fō.

<sup>10</sup> Negur ī aya wau ifenēya ifanan anī bunem, aya fō inoya keleī biya tamo gen, fō inoya nigin gariya anon, age afe di, tako nem anī teten fō inof. Anī ere, tamo mugu mugu el de, lo de fen, fō dinouf nigin lo difalauf. <sup>11</sup> Ere nigin, fō gariya inon, are Jesus Kristus, tako nem fō gariya fire inoya kisi feleya sā. <sup>12</sup> Tamo takam fō gariya enei teten, gol, silwa, meein moni odug, aa, ye ye be, wit turu nem fō inouf are, <sup>13</sup> yogen kabī naig be

fiya are yaorouf, ere nigin, Kristus nē naa bun, anī lalan bun irousí inouf. Are yā ado wō ye di, yā anim tamo mugu mugu nē kabī nē kaū es fouf. **14** Ī ereb inon anī ifarlauf are, ī yogon mala solo yalouf. **15** Ī ereb inon anī isaikalauf are, ī agogon youf. Ī yogo Negurem kel yalouf, anī ere, ī yā malan tamal ulō yesiya tamo gen ibodōf.

**16** Ā aug are Negur nē tempel, Negur nē Awa Uur ā namein ibodōdig anī, ā to keleī de? **17** Taka ī Negur nē tempel daūf fouf are, Negur ī tamo anī daūf irailauf, ere nigin, Negur nē tempel are fateul, are ā tempel anī.

**18** Ā aug to udegnēgouf. Āgenei taka ī, gama sain enei nē keleī bunem, aya kisi biya ado yef are, ī neneya wō youf bagai, are ī kisi biya ado wō youf nigin age fouf. **19** Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ī, kisi biya adodo tamo dogo neid keleī anim kor bun dilelel mog, gei fedidig,”\* **20** Negur nē Itotoya takag irok, “Odug ī keleī, kisi biya adodo tamo neid kisi, are ege.”† **21** Anī nigin, tamo yeneid to walesagauf! Ere nigin, ereb ereb ganan are āgenei, **22** Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei, **23** ā Kristus nē, Kristus ī Negur nē.

## 4

### *Kristus Nē Aposel Tar*

---

\* **3:19:** Job 5:13    † **3:20:** Sam 94:11

<sup>1</sup> Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difouf. <sup>2</sup> Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anī, marau orof. <sup>3</sup> Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nagineg to es afedig. <sup>4</sup> Neu kisi are karētut, anī ere, anim aya mosor sā to auf. Odug im aya es fiyaf. <sup>5</sup> Anī nigin, es fiya nē sain fau wōya sā mog, to es gouf. Tari gef uleg, Odug isiyouf bun. Ī ereb gugum bun iminek anī lalan bun irou isi fen, tamo neid waud bun kisi ibodok anī yaor fouf. Sain anī bun, idi mugu mugu Negur bun yana odug dalouf.

<sup>6</sup> Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amā bun keleī walogouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf. <sup>7</sup> Ere nigin, aim ō, taka wal fiya inenok? Ō mogo ado, ere anī ō to walen? Ō mogo anī walen ouf are, ere nigin ō anī to walen gen, ogo yanā walesef?

<sup>8</sup> Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowā gen, are amā geid sā. Amā ā geid king wowā tauf nigin, ā momoi bagai king wowā gem anī, aya orouf bagai. <sup>9</sup> Ere nigin, aya kisi afef, Negur ī amā aposel, tamo yukesiya nigin dinenēdig gen, tamo dilouf nigin, gī bun idikeleyan bagai inenaman. Saa teneub ado, are tamo ado

engel meleid bun, amā fele difamāf nigin inoman. <sup>10</sup> Amā Kristus nigin neneya mabodok, anī ere, ā Kristus bun kisi biya bagai ubodōgef. Amā totol sā mabodok, anī ere, ā totol ubodōgef. Ā yeneī dalesedig, amā yanamā to dalesedig. <sup>11</sup> Kulu nem isi gama sain enei bun, amā naū ado naan ail mayok, amā gabar masasak mafilaik, amā darau difanamak, amā fō sā. <sup>12</sup> Amā mug imamam kabī totol maledig. Sain amā disisnamak are, amā el fiya mafenēdidig. Amā darau difanamak are, darau anī faali mafedig. <sup>13</sup> Bouwamā bun od duk sain, amā molol nem od solo mafedig. Mabodok masih gama sain enei bun, amā teneub enei nē ido gen ado, erek erek ganan nē moto gen wō maun.

<sup>14</sup> Aya ā mama ifeneīya nigin enei to atotof, anī ere, ā neu kesu tar oboiyou gen wedereī arouf nigin age afef. <sup>15</sup> Ere nigin, Kristus bun, ā ten tausen kulat tamo ado, anī ere, ā temeī musei sā, are aya Kristus Jesus bun biya od bunem temeī wō aun. <sup>16</sup> Anī nigin, aya ā madē wiyagauf nigin totol bagai arokeneik. <sup>17</sup> Gariya enei nigin, aya neu kesu Timoti, ī Odug bun aya oboiyou ado dō fiya biya, ā gein sur afef. Im Kristus Jesus bun, neu mata ibodōya nē suma anī, ā wedereī fokō fouf, are aya modoū ganan sios ganan bun afelnēdidig age fiya bagai.

<sup>18</sup> Ā tunī, Pol ī amā garan to isiyouf ge fen, ā aug yeneī walesegen. <sup>19</sup> Anī ere, Odug orouf are, aya kaisā bagai ā gein asiyouf, age afe fen, aya dogo yeneid yaleseya tamo eneidi naig de wogō def anī sā, anī ere, erek megeir idi ado anī fele afouf. <sup>20</sup> Ere nigin, Negur nē tano are ege wogōya

nē sā, are megeir nē. <sup>21</sup> Ere anī ã oroyeik? Aya wagagā yeīya nigin tibog ado ã gein asiyouf de, wau laa fiya ado molol bunem asiyouf?

## 5

### *Tureī Noli Tobonunā Ado Walelnēgouf!*

<sup>1</sup> Ā atun, noli tobonunā age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig. <sup>2</sup> Age fe di, ã aug selī wabigedig! Age fiya ban, ã wauī gudūf fen, tamo tobonunā enei inof anī, āgenei uyu kū fiya bun walelnēgouf, are deuf. <sup>3</sup> Aya bouwau ã geid to ibodok, anī ere, uur bun are, aya ã geid tabodok. Aya ã geid ibodōya gen, tamo enei age fen, are ī mogo es afiyen. <sup>4</sup> Ā neda Odug Jesus yana bunem guru gouf bun, aya uur bun ã geid tabodōf, are neda Odug Jesus nē megeir ibodōf sain bun, <sup>5</sup> tamo enei Satan ima bun unenēg, anī bunem, mosor nē bouwa daūf iraile fen, Odug nē naa bun yagon uur isennēyā yalouf.

<sup>6</sup> Ā yeneī yaleseya are to biya. Yis naal bagai flawa obu namen kabī yaledig anī, ã to keleī de? <sup>7</sup> Ā flawa mata yis sā gen wō gouf nigin, yis tubu anī waleleg, are ã anī flawa mata yis sā. Ere nigin, Kristus, neda Pasa naa nē sipsip naal, sesewi difiyen. <sup>8</sup> Anī nigin, ada Pasa Sifa naa anī tarouwauf, are yis tubu, sesen ado to biya nē yis bunem sā, anī ere, bret yis sā, karētut ado momoi nē bret bunem age tafouf.

<sup>9</sup> Aya ã noli tobonunā dinodig tamo kayau geid to nigal gouf nigin, neu pas mogo atotkenein, <sup>10</sup> anī ere, aya teneub enei nē tamo kayau geid

to nigal gouf nigin to orok, are idi noli tobonunā, ereb ereb nigin akorouya, idegēya bunem taka nē safina bē yaleya be, idegēya waitou yana yaleseyā age difedig. Ā idi geid to nigal gouf are, ā teneub enei utorōgouf. <sup>11</sup> Anī ere, gama aya ā bun atotof are, ā taka ī yogo nigin tura ye fen, noli tobonunā, ereb ereb nigin akorouya, idegēya waitou yana yaleseyā, bou yūya od wogōya, naan yōya be, idegēya bunem taka nē safina bē yaleya age fedig, ī weim to nigal gouf. Tamo age fiya ado weim saafeg to wāgauf.

<sup>12</sup> Ere nigin aya idi sios mayarē difaref anī es afediyouf? Are, idi sios namen difaref anī ā to es wiyēdigef de? <sup>13</sup> Negur idi sios mayarē difaref anī es fediyouf. Are Negur nē Itotoya bun eig ye irok kilei, “Ā atun tamo sane anī walelnēgouf.”\*

## 6

### *Momoiya Tamo Kayau Atun Kot Fiya*

<sup>1</sup> Āgenei takam, taka ado fefuya yenēf are, ere nigin ī Negur nē tamo kayau wagedin irouleya ban, ī idi momooya sā anidi bun, mama sā gen es fiya nigin irouledig? <sup>2</sup> Are Negur nē tamo kayau teneub enei es difouf anī, ā to keleī de? Ā teneub enei es gouf are, ā morō naal bagai es fiya nigin kisi feleya sā de? <sup>3</sup> Are amā engel es mafediyouf anī, ā to keleī de? Age fouf are, mata ibodōya enei nē morō es fiya nigin naig fiyauf? <sup>4</sup> Anī nigin, ā teneub enei nē morō age fediya nigin fefuya adouf are, ā haiden idi, sios bun tamo yeneid sā

---

\* <sup>5:13:</sup> Diuteronomi 17:7; 19:19; 21:21; 22:21, 24; 24:7

anidi, es fiya tamo nigin ugirnēdigef de? <sup>5</sup> Aya ã mama yeïf nigin od enei orok. Are ã atun, momoiya tamo kayau gefuya idi atun ibodok anĩ, es fiya nigin kisi biya ado tamo taka sã de? <sup>6</sup> Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

<sup>7</sup> Momoi bagai, ã atun abob nigin kot bun gefuya ibodok anim, ã mogo kuku gen anĩ yaoref. Ere nigin ã idi to utornēdige di, sane diyeïf? Ere nigin ã idi to utornēdige di, didegneïf? <sup>8</sup> Age fiya ban, ã aug udegēg fen, sane ago gedig, are ã tureï tar bun enei ago gedig.

<sup>9</sup> Tamo toboununã sesen idi, Negur nẽ tano to akorouf anĩ, ã to keleï de? Are ã idi to utornēdige di, didegneïf. Idi noli toboununã dinodig, idi idegēyã waitou yana dalesedig, idi seseirã toboununã dinodig, tamo idi bouweid na nẽ sur difedig, tamo tutur, kayau tutur noli toboununã dinodig, <sup>10</sup> idi bẽ daledig, idi ereb ereb safina nigin akorou dedig, idi naan dōdig, idi bou yūyā od wogō dedig, idi idegēyã bunem taka nẽ safina daledig anidi ganan, Negur nẽ tano to akorouf. <sup>11</sup> Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nẽ Awa Uur bunem, Negur mala bun madur bagai wowã gen.

### *Noli Toboununã*

<sup>12</sup> Taka irõf, “Aya ereb ereb ganan nigin sã age afeid kisi feleya.” Are de momoi, anĩ ere, ereb ereb ganan to isennadauf. Aya ereb ereb ganan nigin sã age afeid kisi feleya, anĩ ere, aya ereb

takam to irouna di, ferfer abodōf. <sup>13</sup> Taka irōf, “Saaf are te gourou nē, te gourou are saaf nē.” Anī ere, Negur anī ganan daū falauf. Bouwa are noli toboununā nē sā, anī ere, Odug nē, are Odug ī bouwa anī nē. <sup>14</sup> Are, Negur yogen megeir bunem Odug laa bun tamal yalesnen, are adag ī yalesnadauf. <sup>15</sup> Ā bouweī are, Kristus yogo bouwa nē tunī anī ā to keleī de? Age fiyauf are, aya Kristus bouwa nē tunī ale fen, kayau bouwa na sur fedig ado bagu afouf de? Sā bagai! <sup>16</sup> Tamo ī yogo, kayau taka bouwa na nē sur fedig ado bagu difouf are, ī kayau anī ado bouwa tekelei youf anī, ā to keleī de? Ere nigin, Negur nē Itotoya bun eig ye irok, “Idi urom bouweid tekelei youf.”\* <sup>17</sup> Anī ere, taka ī yogo Odug ado bagu difouf are, ī uur bun Odug ado tekelei youf.

<sup>18</sup> Noli toboununā bun tamal uyagauf. Mosor tunī ganan tamo taka inof, are ī yogo bouwa serē inof, anī ere, taka ī yogen bouwam noli mosor inof, are ī yogo bouwa bun mosor inof. <sup>19</sup> Ā bouweī are Awa Uur Fateul nē tempel, Awa Uur Fateul are ā namein ibodok anī Negur bun tamal walegen are, ā to keleī de? Ā aug, āgenei sā, <sup>20</sup> ere nigin, ā mala odugem na yaleyein. Anī nigin, bouweī anim Negur yana walesagauf.

## 7

### *Tamo Kayau Ado Bagu Fiya Nigin*

<sup>1</sup> Gama od anī ā utotogen nigin arokeneik, tamo ī kayau to yalouf, are deuf. <sup>2</sup> Anī ere, noli toboununā musei bagai ibodok nigin, are tamo

---

\* **6:16:** Jenesis 2:24

mugu mugu ī yogon kayau adouf, are kayau mugu mugu ī yogon tamo adouf. <sup>3</sup> Tamо ī yogon bouwa nigin, yogon kayau to katū fiyēf, age fiya gen, kayau īg yogon bouwa nigin yogon tamo to katū fiyēf. <sup>4</sup> Kayau ī yogon bouwa nē mudur to ibodōf, are yogon tamo nē, age fiya gen, tamo ī yogon bouwa nē mudur to ibodōf, are yogon kayau nē. <sup>5</sup> Ā abob nigin bouweī to katū gouf, anī ere, ā kosē gouf nigin, sain naal bagai yo ge fen, bouweī katū gouf, are kisi falauf. Agog fen, ā bouweī kulatun fiya anī, malai nigin, are Satanem to kisi yeīf nigin, baban ā bouweī bagu gouf. <sup>6</sup> Aya od enei karī gouf nigin orok, are ītāfiya sā. <sup>7</sup> Tamо ganan aya gen dibodok, are aya orouf. Anī ere, tamo mugu mugu idi, Negur bun dogo neid ege luwa dalef, takā ege luwa enei, takā ege luwa anī.

<sup>8</sup> Anī ere, aya kayau tamo yaleya sā, tamo kayau yaleya sā ado, waab arokenēdif, are idi aya gen age de dibodok dilauf, are deuf. <sup>9</sup> Anī ere, idi dogo bouweid nigin kulatun fiya kisi feleya sāf are, tamo idi kayau dalouf, kayau idi tamo dalouf, ere nigin, noli kisi waud bun yā gen bobo reya anī ban, tamo idi kayau yaleya, kayau idi tamo yaleya are deuf.

<sup>10</sup> Tamо idi kayau adodo, kayau idi tamo adodo bun, aya od enei arokenēdif, are ayam sā, Odugem. Are kayau ī ne tamo to itornēf. <sup>11</sup> Anī ere, kayau ī tamo itornēf are, ī tamo takā to yalouf be, are ī yogon tamo ado komo difouf. Are tamo ī yogon kayau to iru irailauf.

<sup>12</sup> Ā tunī ganan bun, aya od enei arokenēdif,

are ayam, Odugem sā. Tura taka ī kayau ado, are kayau ī momoiya sā, anī ere, ī tamo ado ibodōya nigin oro fouf are, tamo ī kayau anī to iru irailauf. **13** Kayau taka ī tamo ado, are tamо ī momoiya sā, anī ere, ī kayau ado ibodōya nigin oro fouf are, kayau ī tamо anī to iru irailauf. **14** Ere nigin, tamо momoiya sā ī, yagon kayau bunem fateulen, are kayau momoiya sā ī, yagon momoiya tamо bunem fateulen. Age fiya sāf are, ā gereī tar idi karētut to dibodōf. Anī ere, idi gama fateul dibodok.

**15** Anī ere, taka ī momoiya sā, iyawau fenē nigin oro fouf are, utornēge di, age fouf. Suma age fiya bun, momoiya tamо be kayau, ereb taka anim to katī fiyek. Are Negur ī ada wau inosiya bun tabodōf nigin iweignadan. **16** Kayau õ, nē tamо usennēf be sā be anī, naig fe di, õ keleī youf? Tamо õ, nē kayau usennēf be sā be anī, naig fe di, õ keleī youf?

**17** Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodōgouf. Are, aya sios ganan bun nun enei anof. **18** Sain Negur ī tamо taka iweignen, tamо ī mogo mulū ilen de? Are tamо ī mulū ileya sā to ilauf. Sain Negur ī tamо taka iweignen, tamо ī mulū ileya sā de? Are tamо ī to mulū ilauf. **19** Mulū ileya are ege, mulū ileya sā areg ege. Anī ere, Negur nē ītāfiya dō fiya anī odug bagai. **20** Tamо mugu mugu ī Negur iweignen sain bun, ī ibodon suma anī bun, agef ibodōf. **21** Sain Negur ī iweignon, õ ferfer ubodon de? Õ anī nigin to morō yōf, anī ere, õ

ferfer itorōya nigin kisi falauf are, anī ō agouf. <sup>22</sup> Ere nigin, taka ī, Odugem iweignen sain bun, ferfer ibodon, ī Odug nē karika tamo ibodok, age fiya gen, taka ī iweignen sain bun, karika tamo ibodon, ī Kristus nē ferfer ibodok. <sup>23</sup> Ā mala odugem na yaleyein. Ā tamo neid ferfer to wowā gouf. <sup>24</sup> Turau tar, tamo mugu mugu ī Negur iweignen sain bun ibodon suma anī bun, agef Negur ado dibodōf.

<sup>25</sup> Kayau taulei nigin, aya Odug bun tamal ītāfiya taka to alen. Anī ere, aya, taka ī Odug nē wau yūya bunem momoi bagai tamo wō yen anī, aya neu kisi afeneik. <sup>26</sup> Gama enei nē morō odug nigin, aya kisi afef, are tamo ī gama ibodok gen, agef ibodōf, are deuf. <sup>27</sup> Ō kayau ado de? Age fiyauf are, ō kayau iru iraileya nigin naab to umirēf. Ō kayau to walен de? Age fiyauf are, ō kayau taka yaleya nigin to umirēf. <sup>28</sup> Anī ere, ō kayau walef are, ō mosor to unof. Kayau taulei taka tamo yalef are, ī mosor to inof. Anī ere, tamo kayau dalef, kayau tamo dalef, idi mata ibodōya enei bun morō musei dalouf, are aya morō enei ā bun to wō youf anī orouf.

<sup>29</sup> Turau tar, aya od enei arokeneik, are sain mogo tobegaf, anī nigin, gama sain enei ilef bun, idi kayau ado, idi kayau sā gen dibodōf; <sup>30</sup> idi maruid isif, idi to maruid isif gen dibodōf; idi waud al difef, idi waud to al difef gen dibodōf; idi ereb taka na dalef, idi ereb taka sā gen dibodōf; <sup>31</sup> idi teneub enei nē safina diroudif, are idi waud adok anī bun to dinouf. Ere nigin, teneub enei, gama agef ibodok anī, inanakalauf.

<sup>32</sup> Aya ã to suwẽ gouf nigin orouf. Tamo kayau sã, ï Odug nẽ kabĩ nigin kisi fedig, are ï ereb age fe di, Odug al fouf nigin kisi fedig. <sup>33</sup> Anĩ ere, tamo kayau ado, ï teneub enei nẽ bouwa isennẽyã nigin kisi fedig, are ï ereb age fe di, yogon kayau al fouf nigin kisi fedig. <sup>34</sup> Age fe di, yogon kisi fara fedig. Kayau tamo sã be, kayau taulei, ï Odug nẽ kabĩ nigin kisi fedig, are ï bouwa ado uur bun fateul wõ youf nigin age fedig. Anĩ ere, kayau tamo ado, ï teneub enei nẽ bouwa isennẽyã nigin kisi fedig, are ï ereb age fe di, yogon tamo al fouf nigin kisi fedig. <sup>35</sup> Aya od enei ãgenei biya fiya nigin orok, aya ã ifõyeif nigin to age afef, anĩ ere, ã madur agog fen, ã aug nigin Odug bun fara fiya sã wenẽgouf nigin age afef.

<sup>36</sup> Anĩ ere, tamo taka ï, kayau taulei yaleya nigin digirnen anĩ, ï bun tobununã biya sã age afef ye fen, kayau ï tamo yaleya nẽ sain mogo wal fe di, tamo ï kayau yaleya nigin kisi fef are, tamo ï yogon oroya kilei age fouf. ï mosor to inof, are idi bagu difouf. <sup>37</sup> Anĩ ere, tamo ï yogon wau bun totol ifar fen, taka nẽ kisim to we fiyẽf, anĩ ere, yogon oroya dõf fen, kayau taulei anĩ to yalouf nigin yogon kisi ifõf are, areg ï tutuk age fouf. <sup>38</sup> Anĩ nigin, tamo ï kayau taulei yalef are, ï tutuk age fef, anĩ ere, tamo ï kayau to yalef are, ï tutuk bagai age fef.

<sup>39</sup> Kayau ï yogon tamo fau mata ibodõf are, ï yogon tamo ado dibodõf. Anĩ ere, yogon tamo laa fouf are, ï yogon oroya dõf fen, taka bun ileya kisi feleya, anĩ ere, tamo ï Odug nigin momoi yef anĩ bun dogol. <sup>40</sup> Anĩ ere, neu es fiya bun, kayau ï

gama ibodok gen, ibodōf are, ī fatuk bagai al fouf.  
Aya kisi afef, are ayag Negur nē Awa Uur ado.

## 8

### *Saaf Idegēya Waitou Bun Sesewi Difen*

<sup>1</sup> Gama, saaf idegēya waitou bun sesewi difedig nigin, ada keleī, are ada ganan keleī ado. Keleī are yogo yana yaleseya inodig, anī ere, wau laa fiya anim biya yalesedig. <sup>2</sup> Tamo ī ereb taka nigin aya keleī yef are, ī ereb taka keleī youf anī ī fau keleī sā. <sup>3</sup> Anī ere, tamo ī Negur nigin wau laa fef are, Negur ī nigin keleī.

<sup>4</sup> Anī nigin, saaf idegēya waitou bun sesewi difedig anī yōyā nigin, ada keleī, are tenebur ein idegēya waitou are ege, anī ere, Negur taka sā, tekelei dogol ibodok. <sup>5</sup> Ere nigin, saa be teneub bun, idi waitou dedig anī dibodok, are momoi bagai waitou musei ado odug musei dibodok, <sup>6</sup> anī ere, ada bun Negur tekelei dogol ibodok, are Dei, ī bun tamal ereb ereb ganan wō yen, ī nigin ada mata tabodok. Odug tekelei dogol ibodok, are Jesus Kristus, ī bunem ereb ereb ganan wō yen, ī bunem ada mata tabodok.

<sup>7</sup> Anī ere, tamo ganan enei keleī sā. Tamo kayau tunī fau idegēya waitou nigin fatuk bagai kisi difedig nigin, sain idi saaf anī doko, idi saaf anī idegēya waitou bun sesewi difen de fen, kisi difedig, age dife di, idi waud totol sā nigin, amuyēdig. <sup>8</sup> Anī ere, saafem ada Negur non to irouladauf, are ada saaf to tāf are, anim ada to daū fadauf, ada saaf tāfeg, anim ada to isennadauf.

<sup>9</sup> Anĩ ere, ereb ã karika ago gouf anim, idi momoiya totol sã anidi bun, naabura gudũ fiya to wenẽdigouf nigin lo walagauf. <sup>10</sup> Ere nigin, taka ï wau totol sã anĩ, õ keleĩ enei ado, idegëya waitou nẽ tempel bun saaf wõ mog ileyõf are, ï saaf idegëya waitou bun sesewi difen anĩ, kumĩ sã to yãf de? <sup>11</sup> Anĩ nigin, turã totol sã, ï nigin Kristus laa fen, are ogon keleim ï daũ fiyek. <sup>12</sup> Sain ã naab enei bun tureĩ tar bun mosor unog fen, dogo neid waud totol sã anĩ daũ wedigef are, ã Kristus bun mosor unogef. <sup>13</sup> Anĩ nigin, ereb aya ãf anim neu turau mosor bun inenẽf are, ayam ï mosor bun to anenẽf nigin, aya muda baban to bagai ãf.

## 9

### *Aposel Ereb Yaleya Nigin Kisi Feleya*

<sup>1</sup> Ereb takam aya katĩ fiyaf de? Aya aposel sã de? Aya Jesus neda Odug to ailien de? ã Odug bun neu kabĩ bunem to wõ gen de? <sup>2</sup> Tunĩ bun aya aposel sã be, anĩ ere, momoi bagai aya ã bun aposel. Ere nigin, ã Odug bun aya aposel kabĩ alef anĩ nẽ uris.

<sup>3</sup> Idi aya es difiyauf nigin dibodok anidi bun, isennaya od enei orok. <sup>4</sup> Amã saaf ado naan yõya nigin to kisi feleya de? <sup>5</sup> Amã, aposel tunĩ ganan, Odug nẽ tura tar ado Pita age difedig gen, kayau momoiya ado amã geid marou malauf, are to kisi feleya de? <sup>6</sup> Takag, aya ado Banabas dogol mata ibodõya nigin kabĩ malouf de?

<sup>7</sup> Aim kusĩ tamo kabĩ yale fen, yogo nigin ereb ereb na yaledig? Aim wain kabier wain iten ken, dogo neid biya to yõdig? Aim sipsip lof fen, dogo

neid su sumin to yōdig? <sup>8</sup> Aya tamo nē lo fiya bunem dogol, od enei orok de? Lo anīg enei nigin tekelei bagai to irok de? <sup>9</sup> Ere nigin, Moses nē Lo bun eig ye itoton, “Õ bulmakau, wit faat biya nē gabar loko fediyouf nigin lalai feid mog, yogan awa to ufokalauf.”\* Negur ī bulmakau nigin kisifef de? <sup>10</sup> Momoi, Negur ī od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaleledig, idi kusu fiya sain bun dogo neid morou morou dalouf nigin waud ise fen, age difedig. <sup>11</sup> Amā ã atun āgenei uur nigin faat mararan ouf are, amā ã bun bouwa buru nē safina kusu mafouf are, anī odug biya de? <sup>12</sup> Tunī ã bun isennēyā enei yaleya nigin kisi falauf are, amā idi wal fiya anī, to malouf de?

Anī ere, amā ã bun safina yaleya nigin kisi feleya enei to age mafen. Age fiya ban, amā Kristus nē biya od to naabura gudū mafouf nigin, ereb ereb ganan faali mafef masin. <sup>13</sup> Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ã to keleī de? <sup>14</sup> Naab tekelei anī bun, Odug iron, are idi biya od wogō def anidi, biya od bunem mata ibodōyā nē safina dalouf.

<sup>15</sup> Anī ere, aya safina yaleya nigin kisi feleya eneidi, anī taka to age afen. Age afe fen, aya, ã aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anī orouf. <sup>16</sup> Aya biya od wogō auf sain bun, aya

---

\* **9:9:** Diuteronomi 25:4

yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf. <sup>17</sup> Aya neu oroya bunem kabī enei alouf are, aya mala yaleya kisi feleya. Are neu oroyam sā, anī ere, aya Negurem kabī ifanan nigin age afef. <sup>18</sup> Age afouf are, ere anī neu mala solo? Are, sain aya biya od wogō auf, aya mala yaleya sā biya od wogō audig, are aya biya od bun mala yaleya nigin kisi feleya anī to age afedig.

<sup>19</sup> Aya tamo taka nē sā, are aya karika, anī ere, aya tamo musei kisi feleya bagai gei afouf nigin, aya yug tamo ganan nē ferfer wō auf. <sup>20</sup> Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun. <sup>21</sup> Idi lo sā anidi bun, aya Negur nē lo bun karika sā, are aya Kristus nē lo farumen abodok, anī ere, aya idi lo sā anidi gei afouf nigin, aya tamo lo sā gen wō aun. <sup>22</sup> Idi furūya anidi bun, aya idi furūya anidi gei afouf nigin, aya tamo furūya gen wō aun. Aya ereb ereb ganan kisi feleya anī bunem, tunī kel gei afouf nigin, tamo ganan bun, idi dibodok gen tobonunā age fiya gen wō aun. <sup>23</sup> Aya biya od nigin enei ganan age afedig, are aya biya od nē el fiya weim talouf nigin.

<sup>24</sup> Gududuya bun, tamo ganan gududu dedig, anī ere, tekeleim dogol mala yaledig anī ā to keleī de? Naab age fiya bun, gududu ge fen, mala walogouf.

<sup>25</sup> Tamo ganan kodē wal difouf nigin age difedig anidi, ereb ereb ganan bun totol bagai tai difedig. Idi mala fau sa kalauf anī dalouf nigin age difedig, anī ere, amā mala gai gai ibodkalauf anī yaleya nigin age mafedig. <sup>26</sup> Anī nigin, aya tamo gariya sā gudu redig gen, to gudu raudig. Aya yau yūdig gen, to ege imau warū yeledig. <sup>27</sup> Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyeid fen, aya yug mala solo yaleya nigin, kisi feleya sā to bagai wō auf nigin age afedig.

## 10

### *Israel Neid Tubuid Tar Bun Weder Irouya Od*

<sup>1</sup> Turau tar, aya ã enei to keleī youf nigin to orouf, are Moses nē sain bun, tubuda tar ganan budū farumen difar fen, idi ganan Maaī Giriya atu diyok dilen. <sup>2</sup> Idi ganan budū bun ado maaī bun naan dale fen, Moses nē ibor tar wowā den. <sup>3</sup> Are, idi ganan uur nē saaf tekelei anī don, <sup>4</sup> idi ganan uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus. <sup>5</sup> Anī ere, Negur ī idi musei ganan nigin wau to al fen, anī nigin, dogo neid bouweid gerere tuan firagagaū difen.

<sup>6</sup> Enei ganan ada wederada irouya nigin wō yen, anī bunem ada idi age difen gen, ereb sane nigin wauda to tanouf. <sup>7</sup> Idi neid tunī gen, ã idegēyā waitou yana to walesagauf. Are Negur nē Itotoya bun eig ye irok, “Tamo kayau saaf naan

doko dibod ken,fafā de dale, noli tobonunā dinon.”\* <sup>8</sup> Ada idi tunī age difen gen, noli tobonunā to tanouf. Age dife di, naa tekelei bun, idi atun tuwenti tri tausen tamo kayau gare den. <sup>9</sup> Ada idi tunī age difen gen, Odug kisi fiya bun to tanenēf. Idi age difen, gogourum didenkesin. <sup>10</sup> Ada idi tunī gen, to nauseir tauf. Idi age difen, daū fiya nē engelem idenkesin.

<sup>11</sup> Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton. <sup>12</sup> Anī nigin, takā ī kisi fef, totol ifaref yef, ī to kubū youf nigin lo falauf. <sup>13</sup> Kisi fiya ganan ā bun wō yedig, are tamo bun wō yedig dogol. Anī ere, Negur ī age afouf yef anī, age fedig, ī kisi fiya ā yaleya kisi feleya sā anī, ā bun to wō youf nigin age fouf. Anī ere, ā kisi yeīf sain bun, Negur ī iyawoya nē naab anīg ifelneīf, anī bunem ā totol ufaragauf nigin sā kisi falauf.

### *Saaf Idegēya Waitou Bun Dinon Ado Odug Nē Saaf*

<sup>14</sup> Anī nigin, neu turau tar oboiyou, idegēya waitou yana yaleseyə bun tamal uyalalagauf. <sup>15</sup> Aya ā tamo kayau kisi biya ado gen arokeneik, ereb aya arok anī, ā aug es gouf. <sup>16</sup> De fiyēya nē kap, ada de fiya tafenēdig, are Kristus nē naud bun bagu fiya sā de? Bret ada mumā tafedig, are Kristus nē bouwa bun bagu fiya sā de? <sup>17</sup> Bret tekelei dogol ibodok nigin, ada musei, anī ere, bouwada tekelei, ere nigin, ada ganan bret tekelei anī bun bagu tafedig.

---

\* **10:7:** Eksodas 32:6

**18** Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? **19** Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de? **20** Sā, anī ere, haiden neid sesewi fiya anī kaa sesen bun difenēdidig, are Negur bun sā. Are aya ā kaa sesen geid bagu gouf nigin to orouf. **21** Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā. **22** Ada Odug kiyeī ifanadauf nigin age tafef de? Ada neda megeir ī wal fiya de?

### *Momoiya Tamo Kayau Neid Tobonunā*

**23** Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan to isennadauf. Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan biya fiya to inouf. **24** Taka ī yagon biya fiya nigin to imirēf, anī ere, tunī neid biya fiya nigin imirēf.

**25** Ereb ereb yaro maket bun na sur difedig anī, āgenei kisi bun to fiya sā wāgauf, **26** ere nigin, “Teneub ado ereb ereb ganan anī namen yenek are Odug nē.”†

**27** Momoiya sā tamo taka, saaf yōya nigin ā iweigneī di, ā ileya nigin oroyeīf are, ereb ereb ā meleī bun inodin anī, āgenei kisi bun to fiya sā wāgauf. **28** Anī ere, taka ī ā irokeneīf, “Enei are sesewi fiya bun difenen,” youf are, tamo

---

† **10:26:** Sam 24:1

irokenein ī nigin ado kisi es fiya yaor karētut ibodōf nigin, saaf anī to wāgauf. <sup>29</sup> Neu wogōya nē gariya are, tamo anī nē kisi es fiya nigin, are āgenei kisi es fiya nigin sā. Taka nem irōf, “Age fiyauf are, ere nigin neu ereb ereb nigin kisi feleya anī, tamo taka nē kisim es fouf?” <sup>30</sup> Aya de fiya bunem saaf āf are, ere nigin taka nem saaf anī nigin, Negur de afiyek nigin bou yūya od irok?”

<sup>31</sup> Anī ere, ā saaf wāgauf, naan wāgauf ado, ereb ereb ganan ago gouf are, Negur nē fula fiya medeīya nigin anī ganan ago gouf. <sup>32</sup> Juda tamo, Grik tamo be, Negur nē sios bun tamo taka, to ye tū fouf nigin ago gouf. <sup>33</sup> Ayag naab ganan bun tamo ganan al afiyēdiyouf nigin age afedig gen, ago gouf. Ere nigin, aya neu biya fiya to amirek, anī ere, musei isennēdiyouf nigin, dogo neid biya fiya amirek.

## 11

<sup>1</sup> Ayag Kristus madē afiyēdig gen, ā aya madē wiyagauf.

### *Negur Yana Yaleseyan Bun Mudur Kerū Fiya*

<sup>2</sup> Aya ā yeneī alesef, ere nigin, ā ereb ereb ganan bun aya nigin karī weleg fen, ifelnēya anī aya ale fen, ā afenein anī, kafī weleg uroug usigef.

<sup>3</sup> Anī ere, aya ā eig fiya anī keleī youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur. <sup>4</sup> Tamō ganan, taka ī yogon mudur kerū fel fen, kosē yef be, profet od wogō yef, ī yogon mudur Kristus mama ifenek. <sup>5</sup> Kayau ganan,

taka ī yogon mudur to kerū fel fen, kosē yef be, profet od wogō yef, ī yogon mudur, are aiwa anī mama ifenek, are ī yogon fatiya korerē feleya gen.

<sup>6</sup> Kayau taka ī yogon mudur kerū fiya sāf are, ī yogon fatiya gudū falauf. Kayau taka ī yogon fatiya gudū fouf be, korerē fouf anim, mama ifenēf are, ī yogon mudur kerū fouf. <sup>7</sup> Tamo taka ī yogon mudur to kerū fouf, ere nigin, ī Negur nē malakanon ado fula fiya medeīya, tamo bun. Anī ere, kayau ī tamo nē fula fiya medeīya, kayau bun. <sup>8</sup> Ere nigin, tamo ī kayau bunem to isin, anī ere, kayau ī tamo bunem isin. <sup>9</sup> Takag, tamo ī kayau isennēf nigin to inon, anī ere, kayau ī tamo isennēf nigin inon. <sup>10</sup> Age fiya nigin, kayau ī, engel idi neid meleid bun, ī tamo farumen ibodok anī ifelnēdiyout nigin, yogon mudur kerū fouf.

<sup>11</sup> Anī ere, Odug bun kayau ī tamo bun yogo mugu to ifaref, tamo īg kayau bun yogo mugu to ifaref. <sup>12</sup> Ere nigin, kayau ī tamo bunem isin gen, tamo īg kayau bunem wō yen. Anī ere, ereb ereb ganan Negur bun tamal isif. <sup>13</sup> Ā aug es gouf, are kayau taka ī yogon mudur to kerū fel fen, Negur kosē fiyek, are de de? <sup>14</sup> Tamo taka fatiya salo isiya adouf anim mama ifenek anī, tamo nē toboununā anī to ifelneik de? <sup>15</sup> Anī ere, kayau taka ī fatiya salo isiya adouf, are yogon fula fiya medeīya. Ere nigin, fatiya salo isiya are, yogon mudur kerū fiya nigin ifenen. <sup>16</sup> Anī ere, taka ī od enei kiwai ifenēf are, ada suma taka sā, Negur nē sios bunege suma taka sā.

*Odug Nē Saaf*

*(Matyu 26:26-29; Mak 14:22-25; Luk 22:14-20)*

<sup>17</sup> Faded fiya dō fiya enei bun, aya ã yeneī to alesef, ere nigin, āgenei guru fiya biya anī fotokar sane isidig. <sup>18</sup> Uruwa bun, aya karī aun, are ã sios nigin guru gef ã atun, fara fiya yenēdig, age afe fen, od tunī aya momoi auf. <sup>19</sup> Ā atun fara fiya bagai yenek, anī bunem, ã atun ai anī Negur yo fiyen anī ifelneīf. <sup>20</sup> Anī nigin, sain ã guru gef, are Odug nē Saaf bagai anī to wōgedig, <sup>21</sup> ere nigin, sain ã saaf wōgef bun, ã abob tari fediya sā, mugu mugu saaf wōgedig, anī nigin, tako ī naū ibodōdig, tako ī naan yōdig. <sup>22</sup> Saaf ado naan yōya nigin ã fō sā de? Ā Negur nē sios lai ge fen, idi safina sā anidi mama wenēdigef de? Aya ã ere ayeīf? Aya enei nigin ã yeneī alesauf de? Sā bagai! Aya enei nigin ã yeneī to alesauf.

<sup>23</sup> Ere nigin, aya enei Odug bun tamal ale fen, āg afenein. Are Odug Jesus, Judas ī kiwai ifenen bō anī bun, bret yale, <sup>24</sup> Negur de fiye ken, bret anī mumāf fen, iron, “Enei neu bouwau, are ã nigin. Aya nigin karī walagauf nigin enei ago gouf.” <sup>25</sup> Naab tekelei bun, bō saaf bure difel fen, ī kap yale fen, iron, “Kap wain enei neu naudou bun bar itenēya mata. Sain ganan ã wāgauf, aya nigin karī walagauf nigin enei ago gouf.” <sup>26</sup> Ere nigin, sain ganan ã bret enei wōg fen, kap enei bun wāgauf, ã Odug nē laa nigin kurō wesig mog, ī fau isiyouf.

<sup>27</sup> Anī nigin, tako ī tutuk sā bret anī yāf be, Odug nē kap bun yāf are, ī Odug nē bouwa ado naud bun mosor inouf. <sup>28</sup> Taka ī yogo nigin es fel fen, bret anī yoko, kap anī bun yāf. <sup>29</sup> Ere nigin, tako ī Odug nē bouwa nigin to kisif fen, bret

yoko, kap bun yāf are, ī yogon es fiya anī yogo yoko. <sup>30</sup> Anī nigin, ā atun musei malegeid fen, dagi didig, āgenei tunī gare den. <sup>31</sup> Anī ere, ada nigin es tafouf are, ada es fiya bun to tabodōf. <sup>32</sup> Sain ada Odugem es fadauf, are ada Odugem madur fadauf, are ī teneub enei nē tamo kayau geid ada mosor ado to youf nigin age fouf.

<sup>33</sup> Anī nigin, neu turau tar, sain ā yōyā nigin guru gouf are, ā abob nigin tari gouf. <sup>34</sup> Taka ī naū fouf are, ī fō bun yāf, anī bunem, sain ā guru gouf, ā es fiya bun to ulagauf.

Sain aya asiyouf, aya faded fiya tobol afeneif.

## 12

### *Awa Uur Fateul Nē Ege Luwa*

<sup>1</sup> Turau tar, aya ā Awa Uur Fateul nē ege luwa nigin to keleī youf anī to orouf. <sup>2</sup> Ā keleī, sain ā haiden ubodōgen, naab fire fire bun ditonei ken, eweid ifofakeleya idegēyā waitou bun, fō yeleya nigin dirou dileyein. <sup>3</sup> Anī nigin, aya ā arokeneik, are taka ī Negur nē Awa Uur bunem wogō yef, ī to irōdig, “Jesus sane lauf.” Takag, taka nem eig ye irōyā kisi feleya sā, “Jesus ī Odug,” are Awa Uur Fateulem dogol.

<sup>4</sup> Ege luwa nigin fire fire dibodok, anī ere, Awa Uur anī tekelei. <sup>5</sup> Kabī gariya fire fire dibodok, anī ere, Odug tekelei. <sup>6</sup> Kabī nē megeir fire fire dibodok, anī ere, Negur tekelei ī, tamo ganan bun, kabī nē megeir ganan nigin kabī yaledig.

<sup>7</sup> Tamo ganan isennēdiyouf nigin, tamo mugu mugu bun Awa Uur yaor fedig. <sup>8</sup> Taka bun Awa Uur bunem kisi biya nē od ifenek, taka bun Awa

Uur tekelei bunem keleĩ nẽ od ifenek, <sup>9</sup> taka bun Awa Uur tekelei bunem momoiya anĩ ifenek, taka bun Awa Uur tekelei anĩ bunem dagi el fiya nẽ ege luwa ifenek, <sup>10</sup> taka bun memelik inoya nẽ megeir ifenek, taka bun profet od ifenek, taka bun ur es fiya ifenek, taka bun od fire fire nem wogōya ifenek, taka bun od fire fire nem wogōya anĩ falei fiya ifenek. <sup>11</sup> Enei ganan Awa Uur tekelei dogol ĩ yagon kabĩ, ĩ yagon oroya dõf fen, tamo kayau mugu mugu anĩ ifenēdidig.

### *Bouwa Tekelei, Fara Fiya Musei*

<sup>12</sup> Bouwa anĩ tekelei, anĩ ere, bouwa anĩ fara fiya musei bunem inof. Yogan fara fiya ganan are musei, anĩ ere, idi bouwa tekelei dinof. Kristus ĩg age fiya. <sup>13</sup> Ere nigin, ada ganan, Juda tamo be Grik tamo, ferfer be kaffi fiya sã tamo, Awa Uur tekelei bunem naan tale fen, bouwada tekelei wõ taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup> Bouwa ĩ fara fiya tekelein to inof, anĩ ere, fara fiya museim inof. <sup>15</sup> Ye ĩ, aya ima sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã. <sup>16</sup> Takag, weder ĩ, aya mala sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã. <sup>17</sup> Bouwa adok malauf are, nainenem karĩ wouf? Bouwa adok wederouf are, nainenem sumeĩ walouf? <sup>18</sup> Anĩ ere, momoi, Negur ĩ bouwa nẽ fara fiya, ĩ orof kilei bagai, mugu mugu ganan inenēdin. <sup>19</sup> Bouwa nẽ fara fiya anĩ ganan tekelei youf are, bouwa ĩ nain ibodõf? <sup>20</sup> Age fiya gen, bouwa

nē fara fiya musei dibodok, anī ere, bouwa de tekelei.

<sup>21</sup> Mala ima to irokenēf, “Aya õ to orouf!” Are, mudur ye to irokenēf, “Aya õ to orouf!” <sup>22</sup> Age fiya ban, bouwa nē fara fiya tunī totol sā tailedig anī sāf are, bouwa ibodōya kisi feleya sā. <sup>23</sup> Ada bouwa nē fara fiya yana sā gen tauf anī, ada yana talesedig. Ada bouwa nē fara fiya yaor fiya kisi feleya sā anī, dede ta, ed tafedig, <sup>24</sup> anī ere, bouwada nē fara fiya yaor fiya kisi feleya anī, ada to dede ta, ed tafedig. Anī ere, Negur ī bouwa nē fara fiya bagu feleid fen, fara fiya yana sā idi yana odug ifenēdin, <sup>25</sup> anī bunem, bouwa bun foi fiya to ibodōf, anī ere, bouwa nē fara fiya idi abob nigin kilei kilei kisi difouf. <sup>26</sup> Bouwa nē fara fiya takam darau yalouf are, bouwa nē fara fiya ganan ī geid darau daledig. Bouwa nē fara fiya takam yana yalouf are, bouwa nē fara fiya ganan ī geid kulī dedig.

<sup>27</sup> Gama, ã Kristus nē bouwa, are ã mugu mugu anī nē fara fiya. <sup>28</sup> Sios bun Negur ī uyulil aposel ganan igirnēdin, anī dō fiya profet, anī dō fiya tise, age fe di, memelik inoya tamō ado, dagi el fiya nē megeir dalen anidi, tunī isennēdiya nigin kisi feleya anidi, ereb ereb lo fiya nigin megeir dalen anidi, od fire fire nem wogōya nigin kisi feleya anidig igirnēdin. <sup>29</sup> Idi ganan aposel de? Idi ganan profet de? Idi ganan tise de? Idi ganan memelik dinof de? <sup>30</sup> Idi ganan dagi el fiya nē megeir dalef de? Idi ganan od fire fire nem wogō def de? Idi ganan od fire fire nem wogōya anī falei difef de? <sup>31</sup> Anī ere, Awa Uur nē ege luwa

odug yaleya nigin kisi totol walogouf.  
Gama aya naab gai biya bagai taka afelneif.

## 13

### *Wau Laa Fiya*

<sup>1</sup> Aya tamo nē od fire fire nem ado engel nē od nem wogō aufeg, wau laa fiya sāf are, aya belo gaōya be, kadod ait gūya gen dogol. <sup>2</sup> Aya profet od wogōya nigin Awa Uur nē ege luwa ado fen, Negur nē waa ganan ado keleī ganan kelei ken, arei godo fiya nigin momoiya odug ado, anī ere, wau laa fiya sāf are, aya tamo ege. <sup>3</sup> Aya ereb aya ado ganan maleg afeneid fen, bouwau atorō di, yā malan dirāf, anī ere, aya wau laa fiya sāf are, aya mala biya taka to alouf.

<sup>4</sup> Wau laa fiya are molol, wau laa fiya are dor yaleya. Ī to kiyei inodig. Ī yogo yana to yalesedig. Ī yogo to seli yabidig. <sup>5</sup> Ī tobounā sane sā, ī yogo nigin aya dogol to yedig, ī kaisā to seye yedig, ī sane difiyek anī to karī yeledig. <sup>6</sup> Wau laa fiya anī sane nigin to kulī yedig, anī ere, momoi nigin kulī yedig. <sup>7</sup> ī famud kulatun fedig, ī famud momoi yedig, ī famud wau isedig, ī famud feseya sā megeir ifaredig.

<sup>8</sup> Wau laa fiya are to bagai sa kalauf. Anī ere, profet od wogōya are sa kalauf, od fire fire nem wogōya are sa kalauf, keleī are sa kalauf. <sup>9</sup> Ere nigin, ada keleī tunī dogol kelei ken, profet od tunī dogol wogō taudig, <sup>10</sup> anī ere, sain kibo feleya bagai anī isiyouf, kibo feleya bagai sā anī sa kalauf. <sup>11</sup> Aya simō bun, aya simō gen wogō aun, aya simō gen kisi afen, aya simō

gen karī aun. Sain aya biyau fen, aya simō nē tobonunā dumeun arailen. <sup>12</sup> Gama ada dodo bun gen malakanon yaor sā tailedig, sain ada tarabā fadauf bun tutuk bagai tailauf. Gama aya tunī dogol keleī, sain anī bun Negur aya nigin ganan keleī gen, aya ganan keleī youf.

<sup>13</sup> Are gama towo eneidi difaref, momoiya, wau iseya ado, wau laa fiya. Anī ere, anī atun wau laa fiya anī odug bagai, ganan wal fiya.

## 14

### *Profet Od Wogōya Ado Od Fire Fire Nem Wogōya Nigin Awa Uur Nē Ege Luwa*

<sup>1</sup> Wau laa fiya nē naab dōg fen, Awa Uur nē ege luwa yaleya nigin kisi totol walogouf, Awa Uur nē ege luwa bun profet od wogōya nē anī bagai walogouf. <sup>2</sup> Ere nigin, taka ī od fire nem wogō yef, ī tamо to wogō fiyēdif, anī ere, ī Negur wogō fiyek. Are, taka nem in od to keleī youf. ī Awa Uur bunem Negur nē waa wogō yef. <sup>3</sup> Anī ere, taka ī profet od wogō yef, ī tamо megeir ifenēdiyouf nigin, waud yalesauf nigin ado, waud yo fouf nigin wogō fiyēdif. <sup>4</sup> Taka ī od fire nem wogō yef, ī yogo dogol isennek, anī ere, taka ī profet od wogō yef, ī sios isennek. <sup>5</sup> Aya ā ganan od fire fire nem wogō gouf nigin orouf, anī ere, aya ā profet od wogō gouf nigin orouf bagai. Taka ī od fire nem wogō yef, ī sios isennēf nigin taka nem yogen od to falei fouf are, taka ī profet od wogō yef anim, taka ī od fire nem wogō yef anī wal fiya.

<sup>6</sup> Turau tar, aya ā gein asi fen, od fire nem wogō auf sain bun, aya kurō fesiya od tunī, keleī, profet

od be, faded fiya nē od, ã bun to arou asiyouf are, ere biya aya ã afeneif? <sup>7</sup> Ereb idi mata sā aitedif, digē be gita age fiya, idi ailō fire fire to dinouf are, naig fe di, taka nem ere seg kodē def anī keleī youf? <sup>8</sup> Takag, taur ait tutuk to wō youf are, aim kusī nigin dodok fouf? <sup>9</sup> Āg age fiya. Ā, āgenei baleim od fire nem yaor to wogō gouf are, taka ī naig fe fen, ã wogō gef anī keleī youf? Ā ege od yau bun urarāgouf dogol. <sup>10</sup> Tenebur ein od fire fire musei dibodok, anī ere, idi gariya sā taka to ibodok. <sup>11</sup> Aya ereb taka nem wogō yef, anī nē gariya to keleī youf are, aya wogō yef anī nē yaū tamo, age fe di, ī aya bun yaū tamo. <sup>12</sup> Āg age fiya. Ā Awa Uur nē ege luwa yaleya nigin kabī totol walededig, anī nigin, sios isennēya nē ege luwa yaleya nigin kabī totol walogouf.

<sup>13</sup> Age fiya nigin, taka ī od fire nem wogō yef, ī ereb wogō yef anī falei fouf nigin kosē youf. <sup>14</sup> Ere nigin, aya od fire nem kosē auf are, neu uur kosē yef, anī ere, neu kisi faat yūya sā. <sup>15</sup> Anī nigin, aya naig afouf? Aya neu uur bun kosē auf, anī ere, aya neu kisi buneg kosē auf. Aya neu uur bun seg alouf, anī ere, aya neu kisi buneg seg alouf. <sup>16</sup> Ō ogon uur bun Negur yana walesauf are, taka ī idi anī to keleī anidi atun ibodok, ī ereb ō urok anī keleī sā nigin, naig fe fen, ī ogon de fiyēya bun “Momoi” youf? <sup>17</sup> Ō ogon de fiya are biya bagai, anī ere, taka to usennek.

<sup>18</sup> Aya ã ganan wal yeīya, od fire nem wogō auf nigin Negur de afiyek. <sup>19</sup> Anī ere, sios bun, aya ten tausen od od fire nem wogōya anī fotokar, tunī tai fediya nigin od faif bun yaor wogō auf anī orouf.

**20** Turau tar, āgenei kisi bun simō gen to ufareg. Sane nigin, momou nē kisi gen ufareg, anī ere, āgenei kisi bun biyeī ufareg. **21** Lo bun eig ye itoton:

Odug irok,

“Tamo od fire nem wogō def anidi bunem ado,  
 yaū tamo sigoreid bunem,  
 aya tamo kayau eneidi wogō afediyouf,  
 anī ere, sain anī buneg idi aya to karī di-  
 fiyauf.”\*

**22** Anī nigin, od fire nem wogōya are, momooya tamo kayau bun uris sā, anī ere, momooya sā tamo kayau bun uris. Anī ere, profet od wogōya are, momooya tamo kayau bun, momooya sā tamo kayau bun sā. **23** Anī nigin, sios guru fiya odug bun, tamo kayau ganan od fire nem wogō de di, tunī anī keleī sā be, tunī momooya sā disiyouf are, idi ā nigin wadā ideneik to douf de? **24** Anī ere, taka ī momooya sā be, taka ī anī keleī sā, tamo kayau ganan profet od wogō de mog, isiyouf are, ī tamo kayau ganan neid wogōya bunem ī mosor tamo ya anī kisi fokō ye di, tamo kayau ganan ī es difiyēf, **25** age dife di, yagon wau bun iminēdig anī yaorouf. Anī nigin, ī kusureis fen, Negur yana yales, “Momoi bagai, Negur ā atun ibodok,” youf.

### *Negur Yana Suma Dōf Yaleseya*

**26** Anī nigin, turau tar, ada naig tafouf? Sain ā guru gef, ā ganan atun taka seg ado, taka faded fiya nē od ado, taka kurō fesiya od ado, taka od fire nem wogōya be, od fire nem wogōya anī falei fiya adof. Anī ganan sios megeir fiya nigin

---

\* **14:21:** Asaia 28:11, 12

ago gouf. <sup>27</sup> Taka ī od fire nem wogō youf are, uru be, towom dogol age fiya sain dale fen, teke tekeleim wogō douf. Age fe di, taka nem od fire nem wogōya anī falei fouf. <sup>28</sup> Od fire nem wogōya anī falei fiya tamo sāf are, wogōya tamo ī sios bun foro yel fen, yogo ado Negur bun wogō youf.

<sup>29</sup> Profet uru be, towom age fiya wogō douf, age de mog, tunī ganan, ereb wogō yef anī el de es difouf. <sup>30</sup> Anī ere, idi guru fiya dibodok anidi atun, kurō fesiya od taka, taka bun isiyouf are, uyu wogō yef are dē yalauf. <sup>31</sup> Ere nigin, ā ganan sain waleg fen, teke tekeleim profet od wogō gouf, anī bunem, ganan keleī dale fen, waud yalesauf. <sup>32</sup> Profet neid uur are profet dogo kulatun dife fen, dogo neid wogōya sain bun dogol wogō douf. <sup>33</sup> Ere nigin, Negur ī ekul fiya nē Negur sā, ī wau inosiya nē Negur.

Tamo kayau fateul neid sios ganan bun age difedig gen, <sup>34</sup> kayau idi sios bun foro del difarauf. Idi wogōya nē modoū to difenēdiyouf, anī ere, idi Lo irok kilei, anī dō difouf. <sup>35</sup> Idi ereb taka nigin to fiya orodiyouf are, idi neid fō bun dogo neid tamo to difediyouf, ere nigin, kayau taka sios bun wogōya are mama ado.

<sup>36</sup> Negur nē od ā bunem gariya inon de? Od anī ā bun dogol isin de? <sup>37</sup> Taka ī kisif, ī profet taka be, ī Awa Uur nē ege luwa alen youf are, ī ereb aya atotkeneik are Odug nē ītāfiya ya anī keleī youf. <sup>38</sup> Taka ī enei welebi fouf are, ī yogo welebi fiyēf.

<sup>39</sup> Anī nigin, turau tar, profet od wogō gouf nigin kisi totol walogouf. Agog fen, od fire nem wogōya nigin to katū wiyēdigouf. <sup>40</sup> Anī ere, ereb

ereb ganan suma bagai dōg fen, biya bagai ago gouf.

## 15

### *Kristus Nē Mata Kel Fāya*

<sup>1</sup> Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf. <sup>2</sup> Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

<sup>3</sup> Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di, <sup>4</sup> ī mū difen, are Negur nē Itotoya bun yenek kilei, naa towo bun ī mata kel fā yen, <sup>5</sup> are ī Pita bun wō ye fen, anī dumen in dō fiya tar tuwelf bun wō yen. <sup>6</sup> Anī bure fele di, ī sain tekelei bun tura tar faif handred wal fiya meleid bun wō yen, anidi ganan musei fau dibodok, tunī gare den. <sup>7</sup> Agef fen, ī Jems mala bun wō yen, anī dumen aposel ganan meleid bun wō yen. <sup>8</sup> Anī ganan bure fel fen, idikeleya bun, ī, aya kesu gō fiya sain sā bun gō difiyan gen anī, malau buneq wō yen.

<sup>9</sup> Ere nigin, aya aposel idi atun naal bagai, aya to biya nigin aposel yeya nigineg kisi feleya sā, ere nigin, aya Negur nē sios darau afenen. <sup>10</sup> Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sā, aya kabī totol idi ganan wal fediya alen, are ayam sā, anī ere, Negur aya ado ibodon in wau ifenēya anim. <sup>11</sup> Age fiya nigin,

ayam be, idim, amā enei wogō mauf, are ā enei momoi gen.

### *Gare Den Tamo Neid Mata Kel Fāya*

<sup>12</sup> Amā Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig? <sup>13</sup> Gare den anidi, mata to ke de fā douf are, Kristus īg mata to kel fā yem. <sup>14</sup> Kristus ī mata to kel fā yem are, nemā wogōya anī kaū sā di, āgenei momooya areg kaū sam. <sup>15</sup> Age fiyam are, amā Negur nigin idegēya od wogō maudig anī dilemam, ere nigin, amā Negur ī Kristus gare den anidi bun tamal turī fiyen anī kurō mafesidig. Anī ere, Negur ī gare den anidi to turī fediyouf anī momoi ouf are, ī Kristus to turī fiyem. <sup>16</sup> Ere nigin, Negur ī gare den anidi to turī fediyouf are, ī Kristuseg to turī fiyem. <sup>17</sup> Negur ī Kristus to turī fiyem are, āgenei momooya are ege, ā āgenei mosor bun fau ubodōgef. <sup>18</sup> Age fiyam are, idi Kristus nigin momoi de fen, gare den anidig fō delem. <sup>19</sup> Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

<sup>20</sup> Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen. <sup>21</sup> Are, laa are tamo tekelei bunem isin nigin, gare den neid kel fāya areg tamo tekelei bunem isif. <sup>22</sup> Are, Adam bun ganan gare dedig, age fiya gen, Kristus bun ganan mata ifenēdiyouf. <sup>23</sup> Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyouf sain bun, idi yogon

dibodok anidi, mata ke de fā douf. <sup>24</sup> Anī bure fele di, idikeleya sain isiyouf, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf. <sup>25</sup> Ere nigin, ī king ibodok ile, yogen kiwai tar ganan yogo ye farumen inenēdiyouf sain anī bun. <sup>26</sup> Kiwai idikeleya bun daū fiya nē, are laa. <sup>27</sup> Are Negur nē Itotoya bun eig ye irok kilei, “Negur ī ereb ereb ganan yogo ye farumen inenēdin.”\* Sain ī irok, are ereb ereb ganan ī farumen inenēdin, are Negur ī ereb ereb ganan Kristus farumen inenēdin, Negur ī yogo enei farumen to ibodok ya anī yaor. <sup>28</sup> Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb ereb ganan nē mudur ibodōf.

<sup>29</sup> Mata kel fāya anī sāf are, idi tamo gare den anidi nigin naan dalef idi naig difouf? Tamō gare den anidi to bagai kel turī fediyouf are, ere nigin tamo kayau idi nigin naan daledig? <sup>30</sup> Takag, amā nigin, ere nigin amā mug sain ganan bouwamā waila bun manenēdig? <sup>31</sup> Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei totol bagai arok, are aya naa ganan laa bun eledig. <sup>32</sup> Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamō gare den anidi to kel turī fediyouf are, Negur nē Itotoya bun yenek kilei, “Saaf ado naan tāf,

---

\* **15:27:** Sam 8:6

ere nigin, nil gare tauf.”†

<sup>33</sup> Å taka nem to idegneñf. “Sane geid nigal yūya bun, tobonunā biya daū fedig.” <sup>34</sup> Kisi biya bun kel usig ufareg fen, mosor inoya utorōg, ere nigin, ã atun tunī Negur nigin keleñ sā difaref. Aya ã mama yeñf nigin enei wogō auf.

### *Kel Fāya Nē Bouwa*

<sup>35</sup> Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?” <sup>36</sup> Å neneya bagai! Ereb õ tu wouf anī, to laa fouf are, anī mata to wō youf. <sup>37</sup> Sain õ tu wof, õ fau ibodōf nē bouwa anī to utenek, anī ere, wit be, ereb taka nē faat dogol.

<sup>38</sup> Anī ere, Negur ī oron kilei, bouwa ifenēdig, agef fen, ī faat fire fire dogo neid bouweid fire fire ifenēdidig. <sup>39</sup> Bouwa ganan tekelei sā. Tamo nē bouwa are fire, gaar bouwa fire, ninā bouwa fire, gau bouwa fire. <sup>40</sup> Saa ilun nē bouweid ado di, tenebur nē bouweideg ado. Anī ere, saa ilun nē bouweid fula fiya medeñya fire di, tenebur nē bouweid fula fiya medeñya areg fire. <sup>41</sup> Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

<sup>42</sup> Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fā yef nē are to bura ledig. <sup>43</sup> Sane bun tu fiya di, fula fiya medeñya bun kel fā yef. Totol sā tu fiya di, totol ado kel fā yef. <sup>44</sup> Bouwa buru maug are tu fiya di, uur nē bouwa are kel fā yef.

---

† **15:32:** Asaia 22:13

Bouwa buru maug ibodok are, uur nē bouwag ibodok. <sup>45</sup> Anī nigin, Negur nē Itotoya bun eig ye irok, “Uyulil inon tamo Adam ī mata ibodōya wō yen.”<sup>†</sup> Idikeleya Adam ī mata ifenēya nē uur wō yen. <sup>46</sup> Uur nē bouwa ketem to isin, anī ere, bouwa buru maug ketem isin. Age fe di, anī dumen, uur nē bouwa. <sup>47</sup> Uyulil inon tamo are tenebur aas nē, anī dō fiya tamo are saa ilun nē. <sup>48</sup> Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. <sup>49</sup> Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup> Turau tar, aya ã arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf. <sup>51</sup> Karī wog, aya waa taka arokeneif: Ada ganan to gare tauf, anī ere, ada ganan bouwada falei fouf, <sup>52</sup> are ereb fili yeleya be, mala kamisāya gen idikeleya nē taur aitouf bun, bouwada agef falei fouf. Taur aite di, tamo gare den anidi kel turī fedi di, to buraya nē ado fā douf, age fe di, ada bouwada falei fouf. <sup>53</sup> Are, buraya nē anī to burauf nē anī ifonūf. Laa fiya nē anī to laa fouf nē anī ifonūf. <sup>54</sup> Buraya nē anī to burauf nē anī ifonūf, laa fiya nē anī to laa fouf nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.”<sup>§</sup>

<sup>55</sup> “O laa, ogon kusī wal fiya nē megeir nain?

O laa, ogon waila nain?”\*

---

<sup>†</sup> **15:45:** Jenesis 2:7    <sup>§</sup> **15:54:** Asaia 25:8    \* **15:55:** Hosia 13:14

<sup>56</sup> Laa nē waila are mosor, mosor nē megeir are lo. <sup>57</sup> Anī ere, Negur de tafiyēf! Í neda Odug Jesus Kristus bunem kusī wal fiya ifanadadig.

<sup>58</sup> Anī nigin, neu turau tar oboiyou, totol ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

## 16

### *Negur Nē Tamo Kayau Isennēdiya Nigin Kolekta*

<sup>1</sup> Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf. <sup>2</sup> Uub ganan nē naa matu bun, ā mugu mugu, augeneī moni waledgedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. <sup>3</sup> Sain aya wō auf, tamo ā ugirnēdigen anidi bun, pas afeneid fen, āgenei ege luwa ado Jerusalem sur afediyouf. <sup>4</sup> Ayag idi geid iley a nigin deuf are, idi aya geid weim malauf.

### *Pol Nē Wau Irōya*

<sup>5</sup> Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. <sup>6</sup> Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōyā nain be alauf bun usennagauf. <sup>7</sup> Aya gama ā ailiyei ken, sain naal ki yeiyā anī to orouf. Odug yo youf are, aya sain naal meluk ā geid tabodōf anī wau irok. <sup>8</sup> Anī ere, aya Efesus ein abodok ele, Pentikos naa wō youf, <sup>9</sup> ere nigin, kabī kaū ado nē

sukar odug, aya bun kā fen, age fe di, musei aya kiwai difanaf.

<sup>10</sup> Timoti isiyouf are, ī ã geid ibodōf bun, ī ereb taka nigin to kumī youf nigin lo welegei, ere nigin, ī aya gen Odug nē kabī faali fef. <sup>11</sup> Anī nigin, taka nem ī yaleya nigin to itorōf. Yagon delē bun wau inosiya ado sur wiyēge di, ī aya gein kel isiyouf. ī tura tar geid disiyouf nigin, aya ololo afedif.

<sup>12</sup> Neda turada Apolos nigin, ī tura tar geid ã gein dilauf nigin, aya totol bagai arokenen. ī gama ileya nigin wau yenēya sā, anī ere, ī ileya nigin sain biya isiyouf are, ī ilauf.

<sup>13</sup> Lo welegei, momoiya bun totol ufareg, tamo totol ado kumī sā wōg, totol waleg. <sup>14</sup> Ereb ereb ganan wau laa fiya bun ago gouf.

<sup>15</sup> Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyouf nigin, kabī totol daledig. Turau tar, aya totol bagai arokeneik, <sup>16</sup> are ã eneidi age fediya ado, idi ganan kabī bun disi fen, kabī dalef anidi farumen ubodōg. <sup>17</sup> Sain Stefanas, Fotunatus ado, Akaikus wō den, aya wau al fen, ere nigin, ereb ã bun tamal ifanamāya anī, idim ã fotokar difanaman. <sup>18</sup> Are, idi age dife di, neu uur ado āgeneig filolō fen. Anī nigin, tamo age fediya nigin de fiyēdiya nē kisi walogouf.

### *Idikeleya Nē Aanya*

<sup>19</sup> Asia provins bun sios idi, ã bun aanya sur difef. Akwila Prisila ado aanya, wau sere fiya ado Odug bunem ã bun sur difef. Sios idi neid fō bun guru difedig idig age difef. <sup>20</sup> Ein tureī tar ganan ã

bun aanya sur difef. ã abob aan wiyẽg fen, fateul bunem umã gouf.

<sup>21</sup> Aya, Pol imauum bagai aanya enei atotof.

<sup>22</sup> Taka ï Odug nigin wau to laa fouf are, isisõya ï bun isiyouf. O Odug, usi!

<sup>23</sup> Odug Jesus nẽ wau ifenõya, ã bun ibodõf.

<sup>24</sup> Neu wau laa fiya, Kristus Jesus bunem ã ganan bun ibodõf. Momoi.

**Mata Ifenēya Nē Od  
The New Testament in the Marik Language of Papua  
New Guinea  
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 11 Nov 2022 from source files  
dated 22 Nov 2019

d7099f9d-3bdf-5620-8eb3-7e6c51cab7ea